



Dronas rumantschas? Tgi sa? Tge che sorta da «challenge rumantsch» è anc avert. La finimira è insatge palpabel e duvrel.

MAD

Challenge rumantsch – 25 students duain sviluppar in prototip

Il focus tschentant ins sin il process, ma i sto resortir insatge palpabel

DA CLAUDIA CADRUVI / ANR

■ **L'ETH trametta 25 students e gimnasiasts en il Parc Ela e lascha sviluppar els ideas per l'avegnir ed il rumantsch. Ma sulet cun ideas na sa cuntentan ins betg. Suentar sto resortir in prototip. Quel preschentant ins lura al proxim FEM a Tavau.** La descripziun cuntegna gronds plets e tuna bunamain in zichel ironic: «Students da l'ETH, atenziun! Vos essas envidads da sviluppar ideas ed inventar in prototip per elevar l'experiencescha da la cultura rumantscha sin in stgalim pli aut. Passentai in'emna inspiranta en las Alps grischunas per che voss prototip persuadia il public al proxim inscunter dal World Economic Forum a Tavau.» 25 students e gimnasiasts èn s'annunciads e sa laschan en sin il challenge rumantsch, di il mainaproject *Tobias Walser*. I sa tracta d'ina truppa interdisciplinara bravamain maschadada.

Truppa bravamain interdisciplinara

Da la partida èn students d'informatica, da biologia, d'ambient, da maschinas, da materialias e da la scienza da manaschi. Ins haja aposta tscherni participants cun in spiert avert, agiunta Walser. Pertge er

il pensum ch'ins tschenta ad els è formulà fitg avert. Tge che vegn or il davos, na sappia oz anc nagin. Il focus metta l'ETH sin il process. Per gliez han ins aposta engaschè il spin off Spark Labs ch'è specialisà da dar furma ad ideas. Ma era sch'il process stettia en il center veglian ins avair a la fin in prototip concret. «Nus na fissan betg cuntents sche nus n'avessan il davos nagut concret», di Walser.

L'urari per il challenge rumantsch vesa ora sco suonda: Il settember sa radunan ils students e gimnasiasts a Riom. En il territori dal Parc Ela duain els vegnir en contact cun la populaziun. L'ETH ha plinavant envidà il scribent *Arno Camenisch*, l'intermediatur da cultura *Chasper Pult*, la collavuratura da la Lia *Carmen Dedual* e sa chapescha *Giovanni Netzer* che ha stgaffi a Riom entaifer paucs onns il pli enconuscent center cultural en l'intschess rumantsch. Durmir e lavurar po la gruppa en la Villa Carisch ed en la Clavadeira nua che Origen maina si teaters.

Ils inscunters, ils discurs, las experienceschas ed impressiuns duain – cun entruidament da Spark Labs – manar ad ideas palpablas. Durant quel temp pon ils students era prender si contact cun

professers e docents da differentas spartas da l'ETH per discutir las ideas e per eruir la realisabladad. Ina da questas capacitads è per exempel *Stefano Brusoni* per management da tecnologia ed innovaziun.

Test vi da Grischuns

L'october suonda in workshop per elavurar in u plirs prototips a Turitg e gia il november lessan ins far tests. Ils prototips vegnan suenter preschentads ad in vast publicum. Las soluziuns las pli persvudentas survegnan il ticket per sa preschentar al stan da l'ETH a chaschun dal FEM a Tavau. Challenge rumantsch vegn promovì da la Lia Rumantscha e dal club grischun da Turitg.

Fin uss aveva l'ETH sustegnì finanziain la professura per litteratura rumantscha a l'Universitad da Turitg. Per motivs da spargn han ins stritgà la contribuziun per la professura, ha i num tar la partiziun da comunicaziun da l'ETH. Enstagl veglian ins metter en pe different projects sco quel dal challenge rumantsch.

Infurmaziuns pli detagliadas chattan ins sin la pagina d'internet da l'ETH cun inditgar il chavazzin da tschertga «rumantsch».